

Na osnovu člana 70. stav 1. tačka 2. Statuta Općine Vogošća ("Službene novine Kantona Sarajevo", broj: 27/14 – Prečišćeni tekst, 14/15 i 9/20 i 23/24) i člana 27. stav 1. Pravila mjesnih zajednica: Kobilja Glava broj: 07-05-2302/13 od 28.11.2013. godine, broj: 14-04-462/21 od 18.03.2021. godine i broj: 14-04-45-1/25 od 22.01.2025. godine, Hotonj broj: 07-05-2303/13 od 27.11.2013. godine, broj: 14-04-453/21 od 17.03.2021. godine i broj: 14-04-45-2/25 od 22.01.2025. godine, Blagovac broj: 07-05-2304/13 od 29.11.2013. godine, broj: 14-04-465/21 od 18.03.2021. godine i broj: 14-04-45-3/25 od 22.01.2025. godine, Vogošća I broj: 07-05-2306/13 od 28.11.2013. godine, broj: 14-04-448/21 od 16.03.2021. godine i broj: 14-04-45-4/25 od 22.01.2025. godine, Vogošća II broj: 07-05-2305/13 od 27.11.2013. godine, broj: 14-04-451/21 od 17.03.2021. godine i broj: 14-04-45-5/25 od 22.01.2025. godine, Svrake broj: 07-05-2308/13 od 26.11.2013. godine, broj: 14-04-463/21 od 18.03.2021. godine i broj: 14-04-45-6/25 od 22.01.2025. godine, Semizovac broj: 07-05-2307/13 od 26.11.2013. godine, broj: 14-04-464/21 od 18.03.2021. godine i broj: 14-04-45-7/25 od 22.01.2025. godine, Gora broj: 07-05-2309/13 od 29.11.2013. godine, broj: 14-04-450/21 od 17.03.2021. godine i 14-04-45-8/25 od 22.01.2025. godine, Općinsko vijeće Vogošća na sjednici održanoj 27.03.2025. godine, donijelo je

ODLUKU O RASPISIVANJU IZBORA ZA ČLANOVE SAVJETA MJESNIH ZAJEDNICA

I. OPĆE ODREDBE

Član 1.

Ovom Odlukom raspisuju se izbori za članove Savjeta mjesnih zajednica, utvrđuje broj članova Savjeta koji se bira za svaku mjesnu zajednicu, način provođenja izbora, mjesto i vrijeme održavanja izbora, organi za provođenje izbora, podnošenje prijedloga, postupak glasanja, brojanja glasova, objavljivanje i potvrđivanje rezultata izbora, mandat članova Savjeta mjesnih zajednica, sredstva potrebna za provođenje izbora i druga pitanja u vezi sa izbornim procesom.

II. BROJ ČLANOVA SAVJETA

Član 2.

U mjesnim zajednicama održat će se izbori za članove Savjeta mjesnih zajednica i izabrati broj članova Savjeta kako slijedi:

- Savjet mjesne zajednice Kobilja Glava	7 članova
- Savjet mjesne zajednice Hotonj	9 članova
- Savjet mjesne zajednice Blagovac	9 članova
- Savjet mjesne zajednice Vogošća II	9 članova
- Savjet mjesne zajednice Vogošća I	9 članova
- Savjet mjesne zajednice Semizovac	5 članova
- Savjet mjesne zajednice Svrake	5 članova
- Savjet mjesne zajednice Gora	5 članova

III. NAČIN PROVOĐENJA IZBORA

Član 3.

U mjesnim zajednicama građani će birati članove Savjeta neposredno tajnim glasanjem. Izbori za članove Savjeta mjesne zajednice provode se na principima utvrđenim Izbornim zakonom Bosne i Hercegovine.

IV. MJESTO I VRIJEME ODRŽAVANJA IZBORA

Član 4.

Izbori za članove Savjeta mjesnih zajednica održat će se dana 11.05.2025. godine u vremenu od 08,00 do 18,00 sati u svim mjesnim zajednicama. Kao mjesto održavanja izbora mogu se koristiti prostorije mjesnih zajednica, škole ili druge pogodne prostorije.

Komisija za provođenje izbora članova Savjeta mjesnih zajednica određuje potreban broj biračkih mjesta po mjesnim zajednicama za provođenje izbora vodeći računa o ukupnom broju birača u svakoj mjesnoj zajednici.

Lokacije biračkih mjesta biće objavljene najkasnije 7 (sedam) dana prije dana održavanja izbora u svim mjesnim zajednicama, na web stranici Općine Vogošća kao i putem RTV „VOGOŠĆA“.

V. ORGANI ZA PROVOĐENJE IZBORA

Član 5.

Organi za provođenje izbora za članove Savjeta mjesnih zajednica su :

- Komisija za provođenje izbora članova Savjeta mjesnih zajednica
- Birački odbori

Komisija za provođenje izbora članova Savjeta mjesnih zajednica organizuje i provodi izbore za članove Savjeta mjesnih zajednica. U pripremi i provođenju izbora Komisija za provođenje izbora članova Savjeta mjesnih zajednica ovjerava izjave kandidata o prihvatanju kandidature, određuje biračka mjesta, imenuje biračke odbore, vrši obuku biračkih odbora, donosi uputstva o postupku provođenja izbora i rješava sva druga pitanja vezana za izborni proces.

Komisija za provođenje izbora članova Savjeta mjesnih zajednica sastoji se od predsjednika i četiri (4) člana, a imenuje je Rješenjem Općinsko vijeće.

Odluku o visini naknade za rad Komisije za provođenje izbora članova Savjeta mjesnih zajednica utvrđuje Općinsko vijeće aktom o imenovanju.

Član 6.

Birački odbor neposredno rukovodi radom na biračkom mjestu i odgovoran je za pravilnost glasanja, brojanja, utvrđivanja i evidentiranja rezultata glasanja.

Svaki subjekt koji učestvuje na izborima za članove Savjeta mjesnih zajednica u biračke odbore predlaže članove i zamjenike članova biračkog odbora shodno broju biračkih mjesta i pripadajućim pozicijama.

Na jednom biračkom mjestu može biti jedan član i jedan zamjenik člana biračkog odbora iz reda subjekata koji učestvuju u biračkom procesu s tim da će se prilikom imenovanja primijeniti rezultat žrijebanja koji provodi Komisija za provođenje izbora članova Savjeta mjesnih zajednica za redoslijed kandidata za glasačke listiće.

Rješenje o imenovanju biračkih odbora dostavlja se svim subjektima koji učestvuju na izborima, Stručnoj službi za zajedničke poslove i poslove mjesnih zajednica i na oglasne table mjesnih zajednica.

Članovi i zamjenici članova biračkih odbora imaju pravo na naknadu za svoj rad. Odluku o visini naknade donosi Komisija za provođenje izbora članova Savjeta mjesnih zajednica.

Član 7.

Svi subjekti koji učestvuju na izborima za članove Savjeta mjesnih zajednica mogu podnijeti zahtjev za akreditovanje posmatrača za praćenje izbornih aktivnosti na biračkom mjestu.

Akreditovanje posmatrača vrši Komisija za provođenje izbora članova Savjeta mjesnih zajednica najkasnije 3 (tri) dana prije dana održavanja izbora.

VI. PODNOŠENJE PRIJEDLOGA

Član 8.

Kandidaturu za članove Savjeta mjesne zajednice mogu podnijeti građani pojedinačno, grupe građana i političke partije koje imaju općinske odbore na području općine Vogošća.

Kandidatske liste se dostavljaju jedinstveno za svaku mjesnu zajednicu, s tim da na listi može biti predložen po jedan kandidat za svako mjesno područje, odnosno dva ako to mjesno područje ima dva kandidata koji predstavljaju to mjesno područje.

Prilikom predlaganja kandidata za članove Savjeta mjesne zajednice, potrebno je voditi računa da sastav kandidatske liste odražava približno nacionalnu strukturu, zastupljenost spolova i mladih.

Uz kandidatsku listu dostavljaju se i ovjerene pismene izjave kandidata o prihvatanju kandidature, te lista sa potrebnim brojem potpisa podrške građana sa područja mjesne zajednice.

Član 9.

Kandidatske liste i kandidature za članove Savjeta mjesne zajednice podnose se najkasnije 30 dana prije održavanja izbora.

Ukoliko se radi o kandidaturi pojedinca za člana Savjeta mjesne zajednice, ista mora biti podržana potpisima 10 građana sa istog mjesnog područja.

Ukoliko se radi o kandidatskoj listi za izbor dijela članova Savjeta mjesne zajednice, ista mora biti podržana potpisima 15 građana sa mjesnih područja za koja se podnosi kandidatura.

Ukoliko se radi o kandidatskoj listi za izbor svih članova za Savjet mjesne zajednice ista mora biti podržana potpisima 20 građana sa svih mjesnih područja iz te mjesne zajednice.

Član 10.

Komisija za provođenje izbora članova Savjeta mjesnih zajednica ovjerava kandidaturu za svakog kandidata.

Kandidatura će biti odbijena ukoliko kandidat:

- nema prebivalište na mjesnom području odnosno nije upisan u Centralni birački spisak za ulice ili naselja koja pripadaju mjesnom području za koje je kandidovan;
- ako nije priložena pismena izjava kandidata o prihvatanju kandidature ovjerena od strane Komisije za provođenje izbora članova Savjeta mjesnih zajednica ili nadležnog općinskog organa za ovjeru ;
- ukoliko ne sadrži potrebnu podršku potpisa građana propisanu u članu 9. stav 2., stav 3. ili stav 4. ove Odluke.
- Za osobe iz člana 30a, Pravila mjesnih zajednica

Član 11.

Komisija za provođenje izbora članova Savjeta mjesnih zajednica utvrđuje konačnu listu kandidata za članove Savjeta mjesne zajednice za svaku mjesnu zajednicu, najkasnije u roku od 15 dana prije dana održavanja izbora.

Redoslijed pojedinih listi kandidata na glasačkom listiću za svaku mjesnu zajednicu utvrđuje se žrijebanjem koje provodi Komisija za provođenje izbora članova Savjeta mjesnih zajednica.

VII. POSTUPAK GLASANJA

Član 12.

U mjesnim zajednicama članovi Savjeta biraju se neposrednim tajnim glasanjem putem glasačkih listića.

Glasački listići se štampaju na listu papira A4 formata bijele boje, a na svaki listić otisnut je pečat Općinskog vijeća.

Za potrebe provođenja izbora odštampan će se 30% listića za svaku mjesnu zajednicu od ukupnog broja birača upisanih u izvod iz Centralnog biračkog spiska. U slučaju da svi glasački listići za područja mjesne zajednice budu upotrebljeni na dan izbora, u prisustvu posmatrača izvršit će se doštampavanje i ovjera dodatnog broja glasačkih listića i dostava biračkim odborima.

Glasanje se vrši upisivanjem znaka X u kvadratić pored imena jednog kandidata u okviru liste kandidata za jedno mjesno područje s tim što birač može glasati za po jednog kandidata za svako mjesno područje na glasačkom listiću, za Savjet mjesne zajednice.

VIII. BROJANJE GLASOVA

Član 13.

Brojanju glasova pristupa se odmah po završetku postupka glasanja nakon zatvaranja biračkog mjesta.

Brojanju glasova pored članova biračkog odbora mogu prisustvovati i posmatrači.

Nakon završetka postupka brojanja glasova, utvrđivanja i evidentiranja rezultata, birački odbor objavljuje rezultate glasanja prisutnim posmatračima.

Komisija za provođenje izbora članova Savjeta mjesnih zajednica objedinjava rezultate sa biračkih mjesta u mjesnim zajednicama u kojima će se izbori provoditi na dva ili više biračkih mjesta.

Za članove Savjeta izabrani su kandidati koji su dobili najveći broj glasova sa mjesnih područja.

Ukoliko dva ili više kandidata imaju isti broj glasova mandat pripada kandidatu koji ima manji redni broj na glasačkom listiću za mjesno područje.

IX. POTVRĐIVANJE REZULTATA

Član 14.

Nakon održavanja izbora Općinsko vijeće Vogošća potvrđuje rezultate izbora za članove Savjeta mjesne zajednice.

X. PRIHVATANJE MANDATA

Član 15.

Izabrani članovi Savjeta nakon potvrđivanja rezultata izbora od strane Općinskog vijeća dužni su potpisati izjavu o prihvatanju mandata koju im zajedno sa uvjerenjem uručuje Komisija za provođenje izbora članova Savjeta mjesnih zajednica, putem Stručne službe za zajedničke poslove i poslove mjesnih zajednica.

Mandat članova Savjeta teče od dana potpisivanja izjave o prihvatanju mandata.

U slučaju odbijanja prihvatanja mandata, kao i prijevremenog prestanka mandata člana Savjeta mjesne zajednice, mandat se dodjeljuje sljedećem kandidatu sa najvećim brojem glasova za navedeno mjesno područje.

XI. MANDAT ČLANOVA SAVJETA

Član 16.

Mandat izabranih članova Savjeta mjesnih zajednica na ovim izborima traje do konstituisanja Savjeta mjesnih zajednica nakon provođenja izbora za članove Savjeta mjesnih zajednica u skladu sa Pravilima mjesnih zajednica nakon održavanja sljedećih lokalnih izbora.

XII. SREDSTVA ZA ODRŽAVANJE IZBORA

Član 17.

Sredstva za održavanje izbora za članove Savjeta mjesnih zajednica obezbjeđuju se u Budžetu Općine Vogošća.

Zadužuje se Stručna služba za zajedničke poslove i poslove mjesnih zajednica da obezbjedi materijalno - tehničku podršku za provođenje izbora.

XIII. STUPANJE NA SNAGU

Član 18.

Ova Odluka stupa na snagu osmog dana od dana objavljivanja u „Službenim novinama Kantona Sarajevo“.

Broj: 01-02-414/25

Vogošća, 27.03.2025. godine



PREDSJEDAVAJUĆI
OPĆINSKOG VIJEĆA VOGOŠĆA

Nihad Hadžić

Nihad Hadžić